



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

***Komunikadu Imprensa
Parlamentu Nasionál
2 Fevereriu 2015***

**Remunerasaun salariál fiksi ba Komisáriu CNE sai preukupasaun Sociedade Sivíl iha
Audiénsia Komisaun A PN**

Iha 29 Janeiru 2015, JSMP liuhosi Unidade Monitorizasaun ba Parlamentu (POP) ho representante sociedade sivíl sira seluk no ajénsia internasionál UNDP no IRI halo audiénsia ho Komisaun A Parlamentu Nasionál. Audiénsia ne'e ho objetivu atu hato'o JSMP nia hanoin ruma ba Komisaun A Parlamentu Nasionál relaciona ho segunda proposta alterasaun ba Lei n^o5/2006, 28 Dezembru, Lei Órgaun Administrasaun Eleitorál.

“JSMP hanoin katak CNE hanesan órgaun supervizaun ba aktu eleitorál ho servisu ne'ebé eventuál de'it no kobre distánsia jeográfiku ne'ebé natoon ho número eleitor ne'ebé ki'ik la presiza iha komisáriu barak ho saláriu fiksi hotu. Nune'e bele evita gastu orsamentu Estadu ne'ebé la nesesáriu,” dehan Diretor Ezekutivu JSMP, Luis de Oliveira Sampaio.

JSMP mós sujere ba Komisaun A atu diskuti kle'an kona-ba número komisáriu no saláriu fiksi ne'e. Tuir JSMP nian hanoin, número komisáriu tenke korresponde de'it ba rejiaun ka devizaun teritoriál ne'ebé eziste. Número komisáriu másimu na'in 5 no saláriu fiksi atribui de'it ba komisáriu na'in 3 ne'ebé servisu tempu tomak ka *full time* no ba restante continua ho subsídiu.

Proposta alterasaun husi governu mak ba artigu 6 kona-ba Estatutu CNE, hodi fornese saláriu fiksi ho montante USD3000/fulan ba komisáriu na'in 7 no subsídiu USD700/fulan ba komisáriu na'in 8 seluk. Aleinde saláriu fiksi no subsídiu ne'e, komisáriu sira mós hetan seña enkontru ne'ebé ho montante USD100/kada enkontru. Tuir planu, komisáriu sira nia enkontru regulár fulan ida dala 6.

Komisaun A propoin atu bele kria estrutura foun CNE hodi hamosu tan Visepresidente Komisaun Nasionál ba Eléisaun (CNE). Inklui hadi'a lei ba servisu STAE no CNE nian iha futuru.

Prezidenti komisaun A, Dra. Carmelita Moniz agradese tebes ho sociedade sivíl no ajénsia internasionál sira nia prezensa hodi fó hanoin ba proposta alterasaun Lei Órgaun Administrasaun Eleitoral ne'e nomós husu ba sosiesade sivíl sira atu bele hato'o submisaun eskrita ba Komisaun A atu akumulá idea sira ne'e hodi hadi'a di'ak liu tan lei refere.

Atu hetan informasaun kle'an liu tan favor kontaktu:

Luis de Oliveira Sampaio

Diretór Ezekutivu JSMP

Telefone: 3323883 | 77295795

www.jsmp.tl

Facebook: www.facebook.com/timorleste.jsmp

Twitter: @JSMPtl